

UTAÖGÖ FEFU HADIA IA BA KHÖ KERISO

Filifi 4:10-19

Famobörö

Sura Wilifi andre, isura Faulo me no tera’u ba mukuru ia ba Roma. Ifarou dödö zamati si so ba Wilifi ena’ö lö mamalömalö so khöra wa’omuso dödö, aro dödöra ba wamati, la’osambua dödöra ba tedou ira ba wamati. Fanurania sura andre, ba tenga nifodanedane ba wa’atobönö soguna khönia ba gurunga. Oya zo’amböta khönia ba gurunga. Hiza, ifaduhu’ö da’ö ba zamati si so ba Wilifi wa fefu hadia ia: fa’afökhö, fa’alumana, ba famakao – tola itaögö ba khö Keriso. Na tenga börö Keriso, ba lö khönia fa’abölö ba wanaögö fefu hadia ia ba wa’aurinia. Börö da’ö, hana wa tola tataögö fefu hadia ia ba wa’aurida irugi ma’ökhö molo’ö nidunödunö Waulo andre?

Fomotokhi

Si föföna, Tola tataögö fefu hadia ia börö me tafahaö ita ba wamönökhi soguna khöda ba khö Zo’aya. Me no lara’u Waulo, ba lö laböhöi ia samati ba Wilifi. Lafa’ohe’ö zoguna khönia ba gurunga. La’onorogö tödö genoni Lowalangi. Hiza, ifaduhu’ö Faulo wa fa’omuso dödönia tenga börö mbualara andrö. Omuso dödönia me so mbua wamatira, nifaduhu’öra föna niha fefu, wa lö tebulö ira wotundreheni Faulo, si no tobali enoni Yesu Keriso.

Ba zoguna khönia, ifatunö Faulo wa no ifahaö ia hewisa ia ba wamönökhi soguna khönia. Famahaönia ya’ia andre, ba nida’ida’i, ifahaö ia ba wangosisi’ö fa’omasi Lowalangi ba fanaha tödö. Moguna sibai khöda göi wa’atuatua Waulo si mane, ba ginötö iada’a. si ndruhunia, oya sibai gohitö dödöda ni’otomosida bongi ma’ökhö. Omasi ita na fahöna khöda zoguna, na tehöngö döida, ba tanö bö’onia. Hiza, lö ta’ila ta’okhögö da’ö ma’afefu börö me ambö fa’abölöda. Bakha ba da’ö moguna wa’atuatua ba wanaha tödö, tafahaö ita samösa ba wamönökhi soguna khöda zamösana. He numana, he kayo, he tobönö ba he mo’amböta, böi mamalö ita wanuno Lowalangi.

Si dua, Tola tataögö fefu hadia ia börö me ibe’e khöda wa’abölö Yesu Keriso (13). Faulo zamaduhu’ö wa fa’abölönia ba wanaha tödö, ba wamönökhi soguna khönia, tenga moroi khönia. Fa’abölönia andrö ba no si’otarai Yesu Keriso, sanuyu ya’ia tobali sinenge, sanuriagö taroma li Lowalangi ba niha ma’afefu. Lö tebulö so khönia Keriso Yesu ba döröwania. I’abölö’ö ia Keriso ba wa’afökhö, ba wa’anumana, ba wa’abuso.

Ena’ö ta’okhögö wa’abölö andrö soroi Yesu Keriso, ba böi mamalömalö ita ba wangondrasi Yesu Keriso. Talulu khönia wa’aurida börö me fa’auri he göi fa’amate, fa’akayo he göi fa’anumana, ba lö tebulö wa khö Keriso ita. Börö da’ö, famatida tenga börö me abölö ita wanaögö fefu hadia ia. Famatida ya’ia da’ö börö me so Yesu Keriso same’e khöda fa’abölö ba wanaögö ba ba wanörö lala wa’auri. Hana moguna ta’anehesi da’ö? Ena’ö böi tasuno ita föna

Lowalangi. Ba da'ö manandrösa sibai niwâ'ö Yesu me imane "me tebai milau hadia ia na lö Ya'o" (Yoh. 15:5c).

Si tölu, Tola tataögö fefu hadia ia börö me so Lowalangi sondrorogö ya'ita ba wa'ahakhö dödönia. Ba da'e göi lö i'ositengagö mbuala nibe'e zamati moroi ba Wilifi andrö Faulo. Ifaduhu'ö göi wa "sökhi zui nilaumi, me no mitolo ndra'odo, ba wamakao andrö khögu" (14). Niha samati tobali ndrela Lowalangi ba wondrorogö enoni-Nia. Buala nibe'e zamati khö ndra enoni ba no "si sökhi sibai hua, sumange omasiö, somasi Lowalangi" (18). Fefu nibe'e zamati tenga ha enoni zanema'ö da'ö. Ba da'e ifaduhu'ö Faulo wa ame'ela ma buala zamati ba no tobali sumange Lowalangi. Börö zi manö, fefu hadia ia nibe'eda ba khö genoni ma ba gorahua zamati andre (osali), ba lö aekhu gölöda, me tenga ba niha tabe'e ia, me tobali ia sumange Lowalangi. Ba zoguna khö genoni, ba tobali noro dödö zamati.

Hiza, ifuli ifa'ema göi Faulo wa samati sanundreheni soguna khö genoni, ba lö tebulö göi "ibe'e khömi dania Lowalangi fefu zoguna khömi, ba lakhömi, ba khö Keriso Yesu, me no fahöna khö-Nia" (19). Eluahania, lö tobali fa'anumanada na tabe'e game'elada ba zanandrösa khö genoni ma ba halöwö Lowalangi. Lö atöngö Lowalangi ba wamaigimaigi nifaluada ba khö ndra enoni-Nia. Ha sambalö isulöni, ba ibönökhi zoguna khöda.

Amarahuta

Töröwada ba guli danö andre, ba no afönu fa'afökhö. Hiza, fa'abölöda ba wanaögö fefu da'ö ba no si'otarai Yesu Keriso. Andrö börö zi manö, böi mamalömalö ita tatou'ö ba danga-Nia fefu noro dödöda ba fa'afökhö nitaögöda. Baero da'ö, böi mamalö göi ita ba wotundreheni halöwö Lowalangi nidönia'ö ndra enoni-Nia si no ituyu ba gotalua zamati. Fefu hadia ia nibe'eda ba khö ndra enoni ma ba gosali-Nia, ba no tobali sumange si sökhi sibai hua, sumange omasiö, somasi Lowalangi, zi manö. Ya itolo ita Lowalangi!

Soli Deo Gloria!

Pdt. Mey Daman Lawolo